

Lectori benevolo s. p. d. eundemque ad dissertationem inauguralem medicam invitat ... / Christianus Godofredus Stentzel.

Contributors

Stentzel, Christian Gottfried, 1698-1748.
Universität Wittenberg.

Publication/Creation

[Vitembergae] : [Eichsfeld], [1735]

Persistent URL

<https://wellcomecollection.org/works/baarx9va>

License and attribution

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection
183 Euston Road
London NW1 2BE UK
T +44 (0)20 7611 8722
E library@wellcomecollection.org
<https://wellcomecollection.org>

5a

Q. D. B. V.

LECTORI BENEVOLO

S. P. D.

EVNDEMQUE

AD

DISSERTATIONEM
IN AVGVRALEM
MEDICAM

INVITAT

ORDINIS MEDICORVM

H.T. PRO-DECANVS

CHRISTIANVS GODOFREDVS
STENTZEL

ARTIS SALVTARIS ET PHILOSOPHIAE DOCTOR,
CHIRVURGIAE PROFESSOR PVBLICVS ORDINARIVS,
PATHOLOGIAE PROFESSOR SVBSTITVTVS.



Rubescant demum, iusto perfusi pudore, iniqui inuidique salutaris obtrectatores artis; desinant tandem nasutuli, nobilissimum Summi Numinis donum, in humanae hominibus solatium ac conseruationem uitae elargitum calumniari ac scabiose traducere; separent ac separare prudenter discant pessima imperitorum uitia artificum, a praestantissimis, quae mortalibus immortalis praestat medicina, com-

modis atque emolumentis. Omnes uno ore Sapientes, inter terrena nobis concessa bona, optimum ac maximum, sanitatem pronunciant; omnes satis norunt ac sciunt, quod prosperae firmaeque defensio, perditae econtra ac labefactatae restauratio ualitudinis, medicinae in acceptum sit referenda. His licet certis atque in aprico positis, quouis nihilofecius fuerunt tempore, praesentique plures adhuc reperiuntur seculo, qui Siracidis consilium respuentes, loco honoris, quem medicinae medicoque debent, omnis conuitia ac calumnias generis in medium afferunt. Medicinam, nihil aliud, quam quandam homicidiorum artem esse, multi Cornelium Agrippam, omnis nequitiae ac flagitiorum diuerforium, sequentes, eructant. A multis, quibus persuasum, quousis, sola temporis mora atque expectatione, morbos, sine ullis adhibitis medicamentis, curari, ars salutaris, tanquam inutilis, superflua, imo noxia, plane repudiatur, damnatur. Tempus uitae nostrae, his succurrentes alii, clamant, cuius summa breuis, spem nos uetat inchoare longam, certis cancellis ac limitibus a Deo circumscriptum ac definitum est, quos nec superare, nec anticipare, humanae permittunt uires. Hinc perinde esse, iidem urgent, siue medicus medicamentaue adhibeantur, siue non; si enim terminus mortis a Deo destinatus adest, tum & accommodatissima praesentissimaque remedia uirtutis eundem haud procrastinabunt, sed ex hoc mundo ad superos abibis; si uero uitae tuae dies nondum omnes absoluti, nullus morbus, licet truculentissimus, te perimet, ac sine medicamentorum usu,

sine ullo, quod aegrotis affertur, subsidio, pristinam recuperabis ualitudinem.

Verum, rem recte tecum adhibito expende atque aestima iudicio; sacrum euolue codicem; plures aegrotorum medicinae ministerio seruatorum historias, quibus omnes referti sunt libri, attenta respice atque examina mente; debita circumstantias sedulitate, quae tam in sanis, quam aegrotis, quotidie occurrunt, obserua atque attende, certe; si tantillum adhuc sanae tibi restat rationis, si non omnem eius usum tibi malitiae ademit studium, si non insaniae teneris uoluptate, ad nostra transiens castra, grato, magna, quae ars salutaris hominibus suggerit, beneficia, animo nobiscum agnosces. His quidem te aliquantulum commoueri, minime uero ab omni, qui menti pertinaciter haereat infixus, scrupulo liberari, regeris, certa enim medicinae fundamenta adhuc desiderari, primo mones loco, & dehinc multorum morborum cognitionem, atque ab eadem dependentem medellam, non difficilem, sed impossibilem plane esse, commemoras; a medicis, addis, uno eodemque remedio, diuersae morbos indolis curari; imperitos peraeque ac peritos in medicae exercitio pathologiae felices esse, & feliciores saepe imperitos peritis, indicas; multos sola medicorum imprudentia, mortis fuisse commissos faucibus, qui sibi relictī adhuc uiuerent, propositis demonstras observationibus. Quo autem ueritatis suffragio, quo iure, certa arti salutari fundamenta denegare potes, quae mathematicis, anatomicis, chymicis, physicis ac pathologicis suffulta demonstrationibus atque experimentis, sana, in suis actionibus, ratione, atque experientia, ducibus utitur? Qua rei conuenientia, stupidorum uitia medicastrorum, ipsi medicinae medicisque genuinis & uere doctis imputare potes? non enim omnes, qui medici superbiunt charactere, ea peritia ac prudentia, quae ab illis exigitur, sunt instructi, plures potius reperiuntur, qui, praeter unam alteramue remediorum formulam, nihil amplius norunt, ac nihilo secius, quia hunc uel illum a gonorrhoea, uel febre intermittente liberarunt, pro magnis habentur medicis. Reperiuntur & alii, quibus in deliciis est impudentia, ac qui omnium studiorum expertes, egregia proceraque corporis mole confisi,

confisi, per uniuersam discurrentes ciuitatem, quibusuis, iisque ab honesto grauique uiro alienis blandimentis anicularum gratiam ac beueuolentiam aucupantur, quae deinceps, more illis apud nos familiari, talem medicastrum, tanquam alterum Apollinem, laudibus ad coelum usque extollunt, sancte iuratoque affirmantes, in tota urbe non reperiri medicum, illi eruditione, peritia, rerumque perficiendarum dexteritate parem. Si tali te, tuique corporis incolumitatem, medico credis ac committis, non mirandum, si maius hinc a medico, quam a morbo, periculum tibi imminet, culpa uero non medicinae, sed uel tuae negligentiae, uel sordidae, cui totus es deditus, avaritiae, tribuenda. Nonne tuarum esset partium, ut in mores ac studia medici inquirereres prius, quam illi corporis tui tuorumque curam commendas ac concedis? Enim uero, cum tibi nummi ac reliquae res domesticae magis, quam sanitas, curae cordique sint, & hinc infamis uoluptate lucelli ductus, Deum minorum gentium, uili, quo nec triobolare prostat scortum, pretio accersendum cures, non aliunde, quam a tua negligentia, stupiditate, atque avaritia, originem malorum, quibus affligeris, deducere potes. Raro certe, cum SCRIBONIO LARGO (a) conqueror, aliquis, priusquam se suosque tradat medico, diligenter de eo iudicat, quum interim nemo ne imaginem quidem suam committat pingendam, nisi probato prius artifice per quaedam experimenta, atque ita electo. Habent itaque omnes pondera ac mensuras exactas, ne quid erroris in rebus non necessariis incidat, uidelicet, quia sunt quidam, qui pluris omnia, quam se ipsos, aestimant. Eadem & Diogeni Cynico fuit mens, qui, aduertens, quosdam agyrtas ab aniculis plerumque commendatos, sine discrimine medicinam facere, se mirari dicebat, quod in solo homine emendo, aspectu atque aliorum consilio acquiescamus, cum ne ollam quidem aut poculum, absque tactu & tinnitu emamus. Proh DEum immortalem! quid idem diceret, corruptum rei medicae statum, peruersumque, qui apud nos uiget, ordinem aspiciens? nam, non ab aniculis saltem agyrtae com-

mendan-

(a) Epist. C. ad Iulium Calistum.

mendantur, sed ipsae aniculae medicinam exercent, ac cuius
sordidissimo, ex infima infamique plebe homini pathologiae ex-
ercitium, impuneque occidendi priuilegium, concessum est.

Hic, nec alius est fons, ex quo tot calamitates, tot dimana-
runt mala, non alia, quam obthurata scaturigine, methodo, auer-
tenda atque auferenda. Dolendum uero, quod illi, qui ad pro-
ram puppimque sedent, nullam penitus medicinae habeant ra-
tionem. Nullus sane ad diuini ministerium uerbi admittitur,
nisi uocatus, confirmatus, atque ordinatus; certus ubique mini-
strorum Dei est numerus. Nulli pariter in foro causam dicere
permittitur, nisi examinato, atque editis in iurisprudencia speci-
minibus ab Ordine Iureconsultorum approbato. Omnes artifi-
ces, omnes opifices, certis ad sua munia legibus adstricti tenen-
tur, ac nullus ab iisdem recipitur, nisi ab artis suae peritis pro
idoneo declaratus; nec sartor fabrilia tractandi, nec sutor merca-
turam exercendi habet potestatem, medicinam uero facere, o-
mnibus est licitum. Haud raro balneator, ludimagister, opilio,
carnifex, uenator, aliique huiusmodi fortis homines, a longe dis-
fitis, ad medelam morborum suscipiendam ac perficiendam, lo-
cis, magnis accersuntur sumtibus, qui, accepta corrasaque ma-
gna auri argentique copia, rebus omnino corruptis ac deplora-
tis, clam discedentes, aegrum in miserrimo relinquunt statu.
Optandum sane esset, meum est cum ingeniosissimo AMMAN-
NO (b) uotum, ut lex illa Cypria, qua permittebatur, ut porco
alienas segetes depascenti & uastanti, dentes truncaret fundi
possessor, in nostris oris quoque sanciretur, sic namque & lin-
guae mendaci tam frequenter in alienos excurrenti agros, & ob-
uia quaeuis dentibus uastanti modus poneretur, & agyrtarum,
nobilissimae arti nostrae sese immiscentium, uimque eidem infe-
rentium, numerus, magno humani generis commodo, non pa-
rum imminueretur. Verum enim uero, res eo rediit iam, ut
circumforaneorum cumulus in dies augeatur, conuiuente ui-
delicet magistratu, non sine insigni subditorum dispendio, ar-
tisue nostrae haud leui ignominia, quam tales ruditate sua ei-
dem

dem inurunt. Quid enim artis regulis congruum ab iis expectari poterit, qui artis eiusdem praeceptorum sunt ignari.

Nec est iniquum, huius rei iniuriam culpamque Superioribus imputare, illi enim, de legum, quas tulerunt, executione minus solliciti, harum transgressores absque omni poena non dimittunt saltem, sed quavis etiam ratione defendunt. Plures ita leges de medicastris in republica bene constituta non tolerandis prostant, quis uero unquam de harum executione cogitavit? publicis potius huiusmodi homines sumtibus, in salutaris opprobrium artis, & humani perniciem generis, aluntur, ac nullus genuinorum querelis ac precibus medicorum locus conceditur. Haec uero uitia, horumque origo, non aliunde, quam a neglecta sui ipsius cognitione, arcessenda, atque ab eadem pariter medicinae ac uerorum contemptus medicorum dependet; nam τὸ γνῶθι σεαυτόν, inter septem Graeciae Sapientum apophthegmata, notatu dignissimum, tum ethicam, tum physicam, sui ipsius cognitionem inculcans, a plurimis, Phrygum instar, sero sapientibus, non attenditur, iique nonnisi in fine, quam iniusti in se, aliosque fuerint, cum summo experiuntur damno, ac dum contemnunt medicinam, medicosque irrident, omnium risui sese demum exponunt. Quis, qualis, quantusque uir fuerit Lipsius, omnibus literatis notissimum est, eundem suspiciebant magnates, illi summos honores, maximaque officia & munera ultro offerebant Principes, idem regii dignitate consiliarii ac historiographi ab Hispaniarum Rege ornabatur, sed idem Lipsius, oraculi instar, ab omnibus fere adoratus, quamprimum febriles experiretur insultus, cum uentriculi imbecillitate, corporis tabe atque alui constipatione coniunctos, adeo commouebatur, ut reiectis, post purgantis usum medicamenti, copiosis, continua cohaerentibus serie, fecibus, totum intestinorum tubum secessisse existimaret, ac de uita omnino desperans, accedente Heurnio, alta exclamaret uoce, de uita mea, mi Heurni, iam actum est, omnia mea effudi intestina; en Lipsii constantiam! en praesentem, magnum ac fortem tanti Polyhistoris animum! en egregium cognitionis sui ipsius specimen! Similem historiam FERNELIUS affert, referens, quod legatus quidam Imperatoris Caroli Quinti, sexen-

nio integro, hypochondriorum tumore doloreque affectus, inie-
cto acriore clymate, durum quippiam, pede longum, excreue-
rit, quod, licet postea dolorum remissionem senserit, pro praecisa
intestini parte habuit.

Merito autem hic obiicitur, cur in commemorati medela
mali, quo Imperatoris laboravit legatus, non in tempore, non
in principio, tale clysmata fuerit adhibitum, ac per totum sexen-
nium, huius morbi extirpatio, sola emollientium applicatione, fu-
erit dilata ac procrastinata? Enim uero, his, quae hic urgen-
tur, urgendaque sunt, antecedentibus iam responsum, atque, uti
arbitror, satisfactum, uitia enim artificum arti non sunt impu-
tanda, cum *Φήμη μὲν πολλοὶ, ἔργα δὲ πᾶγχυ βαιοὶ*, hoc est, no-
mine multi, ex HIPPOCRATIS sententia, medici, re uero per-
pauci reperiuntur. Similia plane in his fata microcosmus cum
macrocosmo experitur, nam saepissime reipublicae salus homini-
bus uel perfidis, uel rerum, quas dirigere ac perficere debent,
imperitis committitur. Quot, malorum uitiiis directorum, ciui-
tates, regnaque, deuastata atque euerfa? Quot homines, quot
milites, ducum ac superiorum negligentia, perfidia, temeritate,
atque imperitia, misere trucidati atque in captiuitatem redacti
fuerunt? Lubens a recentiorum recensio exemplorum absti-
neo, sufficiat dura commemorasse fata, quae Lutetia, tempore
perfidae confoederationis Pontificiae, graui ab Henrico Borbo-
nio obsidione cincta pressaque, sustinuit; nam misera misere
dissidiis ac necessariarum inopia rerum afflicta ciuitas, omnem
recuperandae salutis spem, in Philippo, Rege Hispaniarum, & du-
ce Cenomaniae, DV MAINE dicto, collocatam habebat, illis-
que duobus, tanquam medicis ac liberatoribus suis, toto fidebat
corde; uerum enim uero, illi ipsi, quos male sana ciuitas morbi
sui elegerat medicos, non de malis minuendis, mitigandis ac re-
mouendis, sed cumulandis atque exasperandis solliciti, eandem
ad incitas redigebant. Haec omnia eruditus Gallus, rara no-
stris temporibus auis, sequenti tetrasticho graeco descripsit:

*Ἀφρων εἰς λίμου νόσον ἡ πόλις ἔμπεσε λευκὴ
Ὀλβου καὶ σοφίης κόμπον ἀειραμένη.
Οὐ λήγει τὸ κακὸν Θεοῦ ἐννοίῃσι δυσάλθεϊς,
Ἰητροῦς γὰρ ἔχει ἡ Σπάνιν, ἡ Μανίν.*

Alludit

Alludit hic Poeta uocabulo *Σπείρις*, quod idem, ac penuria Latinis notat, & quo, uerbi *Σπείρια* loco, utitur, ad Regem Hispaniae, &, quod idem, proprium quaerens commodum, inopiae, qua ciuitas affligebatur, sit causa, indigitat. Per *Μανίην* uero, quod idem, ac delirium significat, Dux Cenomaniae, DV MAINE uocatus, pertinacioris dissidii ac dementiae in eadem grassantis ciuitate auctor, eiusque character & uirtutes delineantur.

Scias ergo, quod, uti Praesidem Reipublicae, aut Gubernatorem naui, nihil temere ac fortuito, nihil inconsiderate negligerque agere decet, ita omnis quoque periti ac prudentis medici actio temeritate ac negligentia uacare debet; agentem te, moneo cum LIVIO, (c) ratio ducat, non fortuna, non casus. Longe secus autem idem fieri, quotidianis docemur exemplis, ubi plures summa rerum medico scitu necessariarum ignorantia laborantes, omni carent consilio, ac, brutorum more, sese peccare nesciunt; alii uero imprudentes partim, partim negligentes, omnem commissorum uitiorum culpam in fortunam coniiciunt, sed coecam, cum SENECA, (d) temeritatem pronuncio, quae petit casum ducem. Quemadmodum uero huiusmodi medicis, nomen saltem, minime omen medici obtinentibus, exasperatorum atque in deterius mutatorum culpa morborum, & his succedentis praematurae causa mortis, non iniuste imputatur, ita per saepe infantes omnisque criminis expertes accusari, ac conuictis, quando aegroti ex legibus naturae, uel proprio, quod commiserunt, uitio, obeunt, lacescere, obseruamus; nam non est in medico, semper releuetur ut aeger, interdum docta plus ualeat arte malum. Iniquum est, a medicina immortalitatem desiderare, atque artem, uti FABIVS loquitur, ad exitum alligare, eique mortalitatis euentum imputare. Saepenumero enim acuti ingruunt morbi, qui, antequam accersatur medicus, summa illata uisceribus iniuria, nullam amplius admittunt medelam. Frequenter contagiosi grassantur morbi, ubi, uti Catullus cecinit:

Nulla fugae ratio est, nulla est spes, omnia muta,
Omnia sunt deserta, ostentant omnia lethum.

):(2

Quid

Quid tum solus medicus, necessariis, quae a magistratu populo-
 que suppeditanda sunt, subsidiis destitutus perficere potest? Per-
 inde autem hic res cum medico, ac cum gubernatore navis com-
 parata, hic enim, si in alto graui pressus tempestate, iamiam
 naufragium facturus est, & hinc Notus, hinc Boreas, hinc fuscis
 Africus alis bella mouent, nihil periculum, in quo uersatur, ue-
 ritus, omnem, quo navis seruetur, operam adhibens, omnem-
 que, quo saluus in portum appellat, rudentem mouens, suo
 satisfecit officio; eadem penitus ratione medicus, qui ex artis
 regulis, omnia, debita circumspeditione ac sedulitate, peregit,
 licet euentus non semper expectationi uotoque respondeat, suo
 functus munere ab omni culpa ac crimine uindicandus est; tunc
 denique, cum GALENO (e) pronuncio, officii nostri partes ex-
 pleuimus, cum omnia, quae sana nobis suppeditat ratio, &
 longus usus peritiaque commonstrat, praestitimus. Reprehen-
 dendi hinc maxime, nec uideo, qua ratione, inconsultae notam
 temeritatis a se submouere queant, qui omnibus aegrotis certam
 & mox recuperandam promittunt sanitatem, quod tamen non
 semper in medicinae medicique uiribus est positum, οὐδὲ γὰρ
 ἰατρικῆς, inquit ARISTOTELES, (f) τὸ ὑγίᾱ ποιῆσαι,
 ἀλλὰ μέχρῃς οὗ ἐνδέχεται, μέχρῃ τούτου προαγαγεῖν ἔστι γὰρ
 καὶ τοὺς ἀδυνατοὺς μεταλαβεῖν ὑγίᾱς, ὅμως θεραπεῦσαι καλῶς.
 Legant & perpendant haec illi, qui certam semper promptamque
 morborum medelam a medicina medicisque exigunt, quos, si
 allegatis haud acquiescendum rationibus putant, ad Diuum remitto
 HIPPOCRATEM, (g) qui huiusmodi hominum, plus,
 quam decet, ab arte saluari desiderantium, uesaniam, ignoran-
 tiam atque imperitiam sequentibus increpat: εἴ τις τέχνην, ἐς
 ἃ μὴ τέχνη, ἢ φύσιν, ἐς ἃ μὴ πέφυκεν, ἀξιώσειε δύνασθαι, ἀ-
 γνοῖε μανίην ἀρμόζουσαν ἀγνοίᾳ μᾶλλον, ἢ ἀμαθίᾳ ὧν γὰρ ἔστιν
 ἡμῖν, τοῖσί τε τῶν φύσεων, τοῖσί τε τῶν τεχνῶν ὀργάνοις ἐπικρα-
 τέειν, τούτων ἔστιν ἡμῖν δημιουργοῖς εἶναι ἄλλων τε οὐκ ἔστιν.
 Όταν οὖν τι πάθος ἀνθρώπος κακόν, ὃ κρέσσόν ἐστι τῶν ἐν ἰητρι-
 κῇ ὀργάνων, οὐ δὲ προσδοκᾶσθαι δεῖ ὑπὸ ἰητρικῆς κρατηθῆναι ἀν.
 Plura

(e) Lib. 3. in 6. Epidem. §. 42. (f) Lib. I. Rhetor. cap. 1. (g) Oper.
 edit. cit. Tom. I. Sect. 1. lib. de arte, p. 5.

Plura in his habes momenta, pluraque argumenta, quibus doceris, cur medici opus non semper ex uoto animique succedat sententia.

Praecipua tamen infelicis, qui medicis medicorumque actionibus euenit, successus causa, nempe peruersa uictus uitaeque ratio, cui nimium indulgent aegroti, adhuc restat. Saepe enim medicus in medendi negotio occupatus, omnem mouet lapidem, & non toto tantum pectore, omnique adhibita meditatione ac sollicitudine, sed manibus pedibusque, ut ita loquar, laborat, ut integra quam citissime restituatur ualetudo; iam morbi sentinam, congruorum usu euacuantium, exhaurit; iam imminutibus debita prudentia tempestiue succurrit symptomatibus, eaque auertendo euertendoque, miserum aegroti statum solatur; iam saeuientem in uisceribus dolorem, praescriptis accommodatis anodynis, leniendo mulcendoque, quietem & tranquillum procurat somnum, uiresque defendit languentes; iam aeris incommoda, aliasque iniurias externas abarcendo, iam necessaria diaetae praecepta inculcando, aegroto aegrotique rebus consulit ac prospicit. At enim uero, quale hinc expectandum emolumentum, si palato gulaeque nimium seruit aegrotus, si medicum optima monentem non audit, sed salutaria eiusdem consilia, uel omnino negligit, uel iisdem non in omnibus decenti ratione morem gerit. Iam suo tempore de his, iisque pessimis aegrotorum moribus, salutaris honori artis officientibus, conquestus fuit HIPPOCRATES, (h) scitissime de iisdem sequentem in modum differens: τοὺς δὲ ἐν τῇσι τῶν ἀποθνησκόντων συμφορῇσι, τὴν τέχνην ἀφανίζοντας θαυμάζω, ὅτῳ ἐπαιρεόμενοι ἀξιοχρῆσθαι λόγῳ τὴν μὲν τῶν ἀποθνησκόντων ἀκρησίην οὐκ αἰτίην καθεύδουσι, τὴν δὲ τῶν ἰητρικῇ μελετησάντων σύνεσιν, αἰτίην ὡς τοῖσι μὲν ἰητροῖσιν ἔνεστι, τὰ μὴ δεόντα ἐπιτάξαι, τοῖσι δὲ νοσέουσιν οὐκ ἔστι τὰ προσταχθέντα παραβῆναι. Plures ita Phryx, potior nobilis, cuius meminit MARTIALIS, (i) fratres sororesque, si peruersum uitae genus, atque in uictu intemperantiam respicias, reliquit; quid igitur mirandum, si in eiusmodi hominibus curandis medicus oleum atque operam perdat; sed,

); () : (3

uti

(h) Oper. edit. cit. Tom. Sect. & lib. cit. [p. 4.
de Iusco lib. 6. epigram. 78.

(i) ad Aulum

uti medicus insons, ita miser sane huiusmodi aegrotus existit, ὁ μὴ πυθομένος κορυφαίῳ, ait ISIDORVS, (k) χορὸς ἄμουσος, ὁ μὴ πειθόμενος ἰατρῷ, ἄθλιος· ὁ δὲ κορυφαῖος καὶ ἰατρός, ἔξω αἰτίας ἐσκήνωνται, hoc est, chorus, qui praesidi non auscultat, inconcinnus est; aeger, qui medico non obtemperat, miser est; ast praeses chori ac medicus omni tum crimine tum culpa uacant.

Quis uero mihi, his euietis, negabit, quod sincerus ac fidelis amicus, & genuinus medicus, pro optimis in hoc mundo bonis habenda sint; τὴν Φιλίαν, μέγιστον, τῶν ἐν ἀνθρώποις ἀγαθῶν, amicitiam, rem omnium maximam, atque in humanis praestantissimam rebus, LVCIANVS (l) appellat. Amico fideli nullum in hoc mundo par pretium inueniri, nec bonitatem illius ullo pondere aestimari posse, GREGORIUS NAZIANZENSIS (m) perhibet, Φίλος πιστός, sunt eius uerba, ἅκ' ἔστιν ἀντάλλαγμα τῶν ὄντων ἑδὲν, ἑδὲ τις σαθρὸς τῆς καλλοῦνης αὐτοῦ· Φίλος πιστός, σκέπη κραταιά, καὶ ὠρυχωμένον βασίλειον· Φίλος πιστός, θυσαυρὸς ἐμψυχος· Φίλος πιστός, ὑπὲρ χρυσίου καὶ λίθου τίμιον πυλὺν· Φίλος πιστός, κῆπος κεκλεισμένος, πηγὴ ἐσφραγισμένη, κατὰ καιρὸν ἀνοιγόμενά τε καὶ μεταλαμβάνόμενα· Φίλος πιστός, λιμὴν ἀναψύξεως· ἀνδρὲς δὲ καὶ ξυνέσει διαφέροι, πηλίκον; Quas hic Diuus Pater uirtutes, quae elogia sincere amicitiae, ac fidelibus tribuit amicis, eadem iure meritoque arti salutari, ac genuinis illius cultoribus adscribuntur, cum, quod sincerus amicus, animi curando morbos, idem genuinus medicus, corporis succurrendo infirmitatibus, praestet. Eandem de amico medicoque sententiam MENANDER, idemque, quod sequaris, tibi dedit consilium: τῷ μὲν τὸ σῶμα διατεθειμένῳ κακῶς, χρεῖ' ἔστιν ἰατροῦ, τῷ δὲ τὴν ψυχὴν, Φίλου. Sed quonam, quae-ris, terrarum angulo, qua plagarum parte, sincerum amicum, & genuinum medicum, licet inuenire? Jonathan & David mortui sunt; Damon & Pythias obierunt; HIPPOCRATES nullibi reperitur; rara quidem, sincerus amicus, auis; rara pariter, genuinus medicus, auis; ast iisdem non omnino de-

stitui-

(k) Lib. 4. Epistol. 205.
gerium Nyssenum.

(l) Dimanaete.

(m) Oratione ad Gre-

stituiamur. Plura adhuc in hanc rem dicenda essent, sed manum de tabula. Ad ipsam rem me iam confero, tibiue B. L. Candidati, qui se omnibus, morum elegantia, atque indefessa artis salutaris cultura, honestis doctisque uiris de meliori commendauit, curriculum uitae ab ipso suppeditatum ac conscriptum sisto :

Ego GOTTLIEB AVGVSTVS MICHAELIS natus sum Tauchrizii anno 1712. die 9. Ianuarii, Parente ANDREA MICHAELI, Pastore tunc temporis Tauchritzensum, postea Holtzkirchensum, iam autem Marglissensum Primario, Matre autem ANNA ELEONORA POSSELIA, iam beate defuncta. Hi non solum de eo, quod pietatem spectat, sed etiam, quod ad bene, ornateque uiuendum requiritur, de me instituendo, omni tempore solliciti fuerunt; quare factum, ut partim fidelissima optimi Parentis manu ductione, ad pietatem, partim priuatis informatoribus, Dominis SITTIO & QVEISSERO, ad prima artium liberalium elementa addiscenda ductus fuero. Anno autem aetatis meae XVI. suasu Parentis charissimi Gymnasium, quod Zittauiae floret, adii, ibique per quatuor annos, sub sedula institutione Directoris, arte sua clari, Domini MVLLERI, & Conrectoris BVCHERI, quid ad humaniora, potissimumque Philosophiae fundamenta spectat, hausi. Ex horum Scholis, eorumque persuasione ductus, hanc Musarum sedem, anno 1731. cum alma Leucorea commutaui, & Philosophiae studio me consecraui, in quo pariter atque uniuersa Medicina, tam theoretica, quam Practica, fidum habui aeternumque ueneror ducem, Magnificum Dn. LOESCHERVM, Medicinae atque Physicae Professore. Cuius, ut & ceterorum huius almae Medicorum, BERGERORVM, VATERORVM atque STENTZELIORVM erga me beneuolentiam, studiorumque meorum promotionem,
atque

*atque instructionem, nullo non tempore, summa ueneratione culturus sum. Animus autem, alias etiam Scholas frequentandi, causa fuit, ut anno 1734. Halam migrauerim, ibique Celeberrimos Viros, SCHULTZIUM, CASSEBOMUM, BASSIUM, WEBELIUMQUE, Doctores audiuerim: Mense uero Aprilis praesentis anni denuo Academiae Halensi ualedicens, Ordinem Medicorum Vitembergen-
sium adii, atque ab iis, ut ad examen pro Candidati dignitate reliquisque in arte salutari honoribus obtinendis admit-
terer, petii.*

Satisfactum ita Nostri Candidati desiderio, isque die decimo tertio Aprilis praesentis anni ad examen admissus, talem se praestitit, qualem expectauimus, qualem desiderauimus. Ac cum idem iam in eo sit occupatus, ut futuro die Septembris uigesimo sexto, pro Gradu Doctoris, me Praeside, disputet, Magnificum Academiae Pro-Rectorem, Illustrissimos Comites, Perillustres Liberos Barones, Patres Academiae Conscriptos, Omnium Facultatum Doctores ac Licentiatos, Sacrorum Antistites, & quosuis Liberalium artium ac scientiarum Cultores & Fautores, ad hunc Actum Inauguralem, omni, qua decet, obseruantia, inuitamus, illisque nos nostraque studia submisse commendamus.

Dabam Vitembergae e Museo die xx. Septembr.

CID ID CC XXXV.

